

曲阜清儒著述記

曲阜清儒著述記序

先聖以六經垂訓後儒守其師說各自名家論者以爲諸子之言紛紛推魯爲近况忝在世家遺緒不敢謂文獻不足徵也近者清史館開辦政府頒徵書令除四庫全書著錄外凡碩彥名儒之著述有關於有清掌故者皆令送交史館備采館主並徵求著書人小傳以資考核祥霖按有清二百六十年經術文章彬彬稱盛曲阜雖東魯一隅之地顧考據詞章諸家接踵競起此固由風會習尙使然而發明經訓專精義理者亦不乏其人至於見諸行事或以經術飾吏治或以折衝著武功或見危授命或負骨還鄉或貧孝而哀毀更皆不負所學姑就所見所聞所傳聞者彙記一編以便陸續蒐集都計一百二十二家爲書三百六十四部凡一千七百餘卷惜多散佚摧殘一時搜羅不易祥霖家所藏者悉爲祖父攜至交河縣任所經粵匪之亂城陷身亡書物並歸灰燼概須輾轉徵求未卜能否多獲以爲金匱石室之藏語云作之難傳之尤難古人所爲太息歎悼於無窮也此編以人爲綱系以小傳諸儒之出處學行有可考者必敘述之否則從略不敢臆造其所著之書一例序於傳末曲阜戶籍惟孔顏二姓最夥各以輩

次爲先後餘姓再列其次非有意於軒輊亦不能更以經史子集排比也生存者例不登錄此外所遺漏者尙冀博雅鄉人士分任採訪乃爲厚幸謹書其緣起如右云

中華民國四年三月曲阜孔祥霖識

序目

卷上

孔貞瑄	孔貞燦	孔尙任	孔尙恪	孔尙忻	孔衍璠	孔衍棫	孔衍欽	孔衍淳
孔衍樟	孔衍譜	孔興燮	孔興鈺	孔興詔	孔興治	孔毓佶	孔毓圻	孔毓琚
孔毓埏	孔毓璘	孔毓昌	孔傳樞	孔傳鐸	孔傳誌	孔傳松	孔傳鏞	孔傳鉦
孔傳經	孔傳鉞	孔傳科	孔傳堂	孔傳商	孔傳程	孔繼堦	孔繼濩	孔繼汾
孔繼涑	孔繼涵	孔繼沂	孔繼平	孔繼枋	孔繼炳	孔繼睿	孔繼烝	孔繼鴻
孔廣棨	孔廣杵	孔廣林	孔廣森	孔廣杖	孔廣根	孔廣權	孔廣電	孔廣謩
孔昭烜	孔昭熾	孔昭恢	孔昭杰	孔昭煥	孔昭任	孔昭薪	孔昭虔	孔昭薰
孔昭焜	孔昭美	孔昭煊	孔憲奎	孔憲培	孔憲圭	孔憲莖	孔憲彝	孔憲庚
孔憲達	孔憲毅	孔憲璜	孔慶鎔	孔慶鋤	孔慶銓	孔繁灝		

卷下

顏伯璟 顏伯珣 顏光猷 顏光敏 顏光敷 顏肇維 顏紹緒 顏紹嚶 顏懋齡

顏懋僑 顏懋倫 顏懋價 顏懋价 顏懋企 顏懋恕 顏崇湘 顏崇檢 顏崇榮

顏崇棐 顏崇毅 顏懷禮 顏懷禪 顏懷慤 顏士璋 顏錫嘏 桂馥 陶湘

陳見智 陳士元 陳頴 楊岳春 顧彩 徐國詔 馮雲鵬 馮雲鸞 梁鍾傑

梁廷弼 魏恒祚 賈應寵 野東 符增 姜克謹 鄭曉如 鄭鴻 金德昌

曲阜清儒著述記卷上

孔貞瑄字璧六號聊園 至聖六十三代孫順治庚子舉人究心經史尤精算學韻學律呂學由泰安學正陞雲南大姚知縣滇省鹽法壅滯明定按丁派食之法兵火後丁亡額闕民不能償貞瑄乃請減之民困以息又境有明黔國公勳莊被土酋所占上官受酋賂復主之貞瑄不勝憤爲力爭於上不得遂罷歸著聊園文集一卷詩略十三卷大成樂律全書操縵新說滇記黔記泰山紀勝縮地歌琴瑟譜詩續集各一卷

孔貞燦字垣三官四氏學學錄有西園詩集一卷

孔尙任字聘之號東塘自稱云亭山人 至聖六十四代孫康熙三十三年聖祖幸魯行釋奠禮尙任以監生充講書官稱上意諭大學士明珠王熙著不拘例議用回鑾授國子監博士選戶部主事升員外郎以事休致尙任博學有文名通音律工樂府世稱東塘先生著闕里新志二十四卷節序同風錄十二卷會心錄四卷岸塘文集六卷詩集二卷湖海集十三卷石門集一卷桃花扇傳奇二卷小忽雷二卷

孔尙恪字賓之號竹園諸生有友古齋詩

孔尙忻字霽窗恩貢生官四氏學學錄偕兄尙任講求禮樂輯禮誌一卷樂誌一卷

孔衍璐字庭珍 至聖六十五代孫貢生著廟庭禮樂典故

孔衍棻字懋法號石村濟甯訓導敦行孝友沈靜寡言舉孝廉方正辭舉鄉飲大賓又辭工績
畫深入宋元人室年八十九乃卒著畫訣二卷凡十則又題畫詩二卷

孔衍欽字簡夫性簡易疎率自喜不入城市家貧以教授生徒自給與同邑陶湘顏懋齡懋僑
懋倫孔衍譜衍誌毓璘爲八子有湖山吟集若干卷自著溫泉詩集一卷

孔衍淳字遠舉順治元年任曲阜世職知縣時土寇竊發請省會兵躬爲嚮導賊授首疊遇飢
荒捐資煮粥撫災民全活甚衆曲阜縣志輯於明嘉靖中藩僚孔弘幹後經孔弘復孔弘毅
相繼增修衍淳因即舊板增爲九十二目凡六卷

孔衍樟字載遠少孤貧力耕養母以孝聞性好學夜焚薪照讀尤邃於易自謂學之三十年無
知者晚舉於鄉家居教授以廉隅自厲母歿家不舉火者七日哀毀滅性五月而卒遺命妻
子以衰絰歛著大易中庸一貫圖心性等論九篇

孔衍譜字榆村別字小岸尙任長子以雍正甲午臨雍陪祀授丹陽主簿性通率畫入逸品爲

湖山吟社八子之一有小岸詩一卷

孔興燮字起呂 至聖六十六代孫順治五年襲封衍聖公蚤孤生母陶氏教育之後又撫其子毓埏聖祖幸魯聞其賢御書節並松筠四字賜之興燮事母篤孝十三歲襲爵已凝重能自立臨事剛果有器識尤日夜以繼先人志爲念飭廟庭修禮樂俾復舊制累晉太子太保孔氏宗譜明以前多散佚孔氏子命名舊有一定輩次以序宗派辨昭穆明天啓間前衍聖公衍植增定十字曰興毓傳繼廣昭憲慶繁祥并重修家譜後亦佚至興燮始纂定世家宗譜二十三卷

孔興鈺字紹先康熙庚戌進士選庶吉士散館授江西道監察御史掌山西道事累建大議皆報可出爲陝西潼商道督辦軍務多著勞績攝布政使爬疏宿弊嚴明有方豪猾皆斂迹雅持清操不省私牘卒於官軍民爲之罷市篋中惟圖書數卷僚吏釀金治其喪乾隆三十六年公舉入祀鄉賢祠著塾訓一卷石倉詩選一卷西臺奏議卷佚

孔興詔字綸錫號起鳳官雲南糧儲道有滇遊集一卷

孔興治官郟城教諭有詩集一卷

孔毓估 至聖六十七代孫留心譜牒之學摘孔氏宗譜之大凡爲纂要一卷

孔毓圻字鍾在興雙子康熙六年襲衍聖公十四年晉太子少師凡有專奏皆見施行而錫予便蕃更不可殫述用是感激殊恩益自警惕敦率禮義倡明教學日以風俗人心爲己任夙夜敬慎不自滿假五十餘年如一日所著詩文輒焚削其稿工壁窠書兼通繪事性愛蘭所繪惟蘭最多筆墨秀勁識者珍之雍正元年卒諡曰恭愨著幸魯盛典四十卷蘭堂遺稿二卷重修世家宗譜二十四卷編正孔子家語二卷

孔毓琚字季玉一字璞齋以諸生官曲阜世職知縣以抑強扶弱爲己任吏胥惴惴守法聽訟戒勉似嚴父體恤如慈母無不得當以去在署日論文講吏治治以有聲著曲阜縣志二十卷紅杏山房詩一卷

孔毓埏字宏輿興燮第二子襲翰林院五經博士工詩古文詞康熙間御書遠秀匾賜之著遠秀堂集八卷曲阜縣賦一卷

孔毓璘字叔玉一字繡谷以貢生官昌平州判著水木山房詩一卷

孔毓昌字賡言雍正甲辰舉人官旌德知縣有三肄堂詩草

孔傳樞字虞軒號芥圃 至聖六十八代孫有芥圃遺詩一卷

孔傳鐸字振路號牖民雍正元年襲衍聖公生而恭謹和厚及遇事當斷復剛果不可奪勇於讀書工文詞尤究心濂洛關閩之學精於三禮凡祖廟中一器一物無不詳加訂正又以審樂尤難於考禮乃博求律呂之書冥摅默契至忘寢食久之始有所得恍然曰鍾律正則無不正而欲正鍾律在得其中聲而已此即人心喜怒哀樂未發之中然求於空虛則無憑用以私智則近鑿泥於器物則失真典午而下多求之金石梁隋以後多求之秬黍至王朴則專於鬯黍而不復考之金石夫金石有古今而秬黍有長短皆不可盡信惟用蔡氏更造淺深之法以理合數以數合器以器求聲而黃鍾可得大樂可成所謂中爲大本由心而生也九年引疾替爵於於長孫廣棨年六十三卒著有禮記摘藻一卷三傳合纂十二卷世宗修廟盛典五十卷讀古偶志一卷安懷堂文集二卷申椒詩集二卷繪心集二卷盟鷗草二卷古文源二卷紅萼詞二卷炊香詞二卷

孔傳誌字振文號西銘別號螭菴毓圻次子學瞻才敏工書畫篆刻襲五經博士世宗臨雍入京陪祀賜六藝世家四字額著有補閒堂集二卷清濤詞二卷軟錕鐻傳奇二卷

孔傳松字振茂號鶴林雍正壬子舉人官曲阜世職知縣多善政特恩世襲六品官有虛鏡齋

詩

孔傳鏞字序東號墨稼毓圻第四子官太原同知有聽蕉齋詩集

孔傳鉦字振遠號松翠毓圻第五子弱不好弄動中矩矐若成人四兄痘殤母夫人慟甚遠膝
勸慰收淚乃已孝感熊相國聞而異之許字以女雍正八年授聖廟三品執事官肅穆雍容
稱其家風董修闕里盛典與諸聞人討故實談時務皆服其能顧念兩兄早世弟出爲叔後
懼子子一身傷母心不片刻離左右已而宗子病彌留託貌孤流涕許諾府事無細大無或
旁撓家臣畏懼蓋有孝友之風焉著炊經堂詩集四卷

孔傳經字向亭號巨川諸生有小龍山人詩稿

孔傳鉞字秉虔號節倩嘉慶丁丑進士官吏部主事有錯餘詩文集片雲詞

孔傳科字振修一字溟符乾隆甲子舉人官寧津知縣有耘圩詩草

孔傳堂字振升號升菴少好學以立誠居業動息有養爲宗雍正甲辰成進士授祠祭主事轉
員外郎調武庫郎中揀發廣西知府會土民李金星謀不軌制府請改其地爲鎮安以傳堂

爲守傳堂奉檄赴百色勘金星案畢馳赴任寬巖皆有法乃請免下雷州等八州常貢建學宮置博士弟子員延漢人有學者教之擒向日武亂之巨魁誅之釋其黨却土官承襲陋規三年民大悅以終養假歸起補貴州思南府治溝洫正疆界新孔廟修祭器舉送學賓興鄉飲禮月進諸生而課之尋攝平越郡篆隨欽差審理疑獄毋枉縱諸所設施皆廉平後以病還里宗黨奉爲模範著有學修雜記四卷識字日知錄二卷琴律易知四卷

孔傳商字振子號雪村雍正二年臨雍欽賜縣丞有藕絲詞

孔繼堉字阜村號叔方 至聖六十九代孫父傳煜四氏學學錄聖廟五品執事官母陳氏繼堉天性孝友年十二出繼從父傳源嗣母杜氏青年苦節撫繼堉如己出繼堉先意承志數十年如一日嗣母歿事本生母愛愈篤與昆季推讓財產怡怡無間乾隆甲寅舉於鄉嘉慶壬戌成進士分戶部貴州司學習清慎自矢勤理案牘貴州司約各省關稅成課實力稽核吏不敢欺旋補四川司主事已患病矣素性謹厚謙讓寡言笑退然如不勝衣及遇事持正無阿徇與朋友交坦白相示急人之急公務餘閒以書史自娛卒年五十有一病革泣曰余心事未完蓋以母爲念也著有文集一卷

孔繼濩字體和號純齋傳鐸嫡長子好讀書能強記席豐履厚處以謙冲克守 先聖持滿之

訓未襲封而卒雍正十三年贈衍聖公有純齋遺草一卷

孔繼汾字體儀號止堂傳鐸第四子乾隆三年恩貢生丁卯舉人由內閣中書補戶部主事篤志力行風骨峻潔高宗幸魯屢充引導官以講書稱旨遂蒙特用手校經史刊板爲家塾讀本字畫皆本說文識者珍之修家儀一書冠昏喪祭罔不具備迄今子孫遵守之在軍機處行走時屢荷特達之知行將大用適以公事被劾幸荷天恩得以昭雪南游武林卒於梁學士同書家著闕里文獻考百一卷樂舞全譜二卷孔氏家儀十四卷匡儀糾謬集三卷癸未與姪廣柞共錄嫡系小譜十卷甲午重修之又行餘詩草二卷詞附又校刻文獻通考序一卷

孔繼涑字體實號谷園別號馥谷居士乾隆戊子舉人官內閣中書好學工書初學張照後宗宋四家手摹古今名蹟百餘卷名玉虹樓帖爲海內所推重與梁學士同書齊名故有南梁北孔之稱有谷園論書一卷玉虹樓詩詞四卷

孔繼涵字體生一字誦孟號葑谷傳鉦子乾隆庚辰舉人辛卯進士官戶部河南司主事充日

下舊聞纂修官篤於內行天性過人其在戶部駸駸嚮用矣一旦以母氏心疾遽移告歸養三年而母歿又三年而繼涵歿於天文地理經學字義算數之書無不博綜集漢唐以來石刻千餘種與經義史志相比附遇藏書家罕傳之本必校勘付鈔以廣其傳卒年四十有五刻微波榭叢書曰校訂張參五經文字三卷唐元度九經字樣一卷算經十書五十卷杜預春秋長歷十卷春秋土地名十四卷趙汭春秋金鎖匙一卷宋庠國語補音三卷趙歧孟子注十四卷又校休甯戴震遺書爲毛鄭詩考正四卷考工記圖二卷杲溪詩經補注二卷孟子字義疏証三卷原善一卷原象一卷續天文略三卷勾股割圓記三卷方言疏証十三卷聲韻考四卷聲類表十四卷水經注四十卷水地記一卷策算一卷文集十卷自撰考工車度記補杜氏考工記解勾股粟米法釋數同度記各一卷此外著有紅欄書屋詩集四卷文集二卷斷冰詞三卷水經釋地八卷

孔繼汧字體源號蒲谷聖廟五品執事官著五泉莊擬古樂府一卷

孔繼平字秀嶺好施與歲飢稱貸以濟其鄉人有秀嶺詩草一卷

孔繼枋字蔭寰貢生有映槐堂詩二卷

孔繼忻字景炎號蔗亭拔貢生官永平知府早歲知名高宗南巡赴行在獻詩由教官擢縣令旋至知府所至有政績年八旬恭與千叟宴鄉里榮之著有蔗亭詩二卷

孔繼睿字體範號思亭乾隆己卯舉人官鎮遠知縣先任上虞時曹娥江陡漲漂沒田廬慨然捐俸築海塘十餘里民名之曰孔公塘著有榕蔭軒詩輯二卷

孔繼炆字體明號菊亭有焚餘草

孔繼鴻字漸達嘉慶辛酉進士歷官永年棗強知縣所至有聲著默齋文稿一卷

孔廣棻字京立號石門 至聖七十代孫好經術嫻禮儀雍正九年襲衍聖公乾隆三年高宗

臨雍應召入京上親耕耤田頌視學大禮慶成賦各一篇上嘉覽焉六年以曲阜知縣孔毓璠不職列狀上告毓璠亦許以數事上命大臣同巡撫會勘勘者微不得實有異詞詔原勿問八年卒賜恤典如故事廣棻性本亢爽英毅後更事既熟純粹謹密篤於孝友與人交不設城府尤勇從善下至臧獲輩有以讜言進者皆虛以聽受即不當亦弗罪也年三十一而卒著敏求齋文集八卷詩集四卷外集一卷

孔廣柞字京修號省山繼濩次子留心文獻供事廟庭與修宗譜咸資考訂有澗水亭集五卷

修卉書屋詩三卷

孔廣林字叢伯號幼髯繼汾長子署太常寺博士博雅好古專治鄭學生平著作一百三十二卷凡四十四萬五千餘言年二十六即絕意進取阮相國元嘗謂海內治經之人無其專勤積詩三千六百餘首自以爲不足傳悉焚棄之遺書十一種曰周禮肌測七卷儀禮肌測一十八卷吉凶服名用篇九卷禘祫臚解一卷明堂億一卷士冠箋一卷通德鄭氏遺書所見錄七十二卷延恩集一卷幼髯韻語錄存一卷外集一卷溫經樓游戲翰墨二十卷

孔廣森字衆仲又字槩軒廣林之弟乾隆戊子舉人辛卯進士官檢討居大母與父喪竟以哀毀卒年三十有五聰明特達富於著述少受經於戴震爲三禮及公羊春秋之學作篆隸書入能品尤工駢體文汪中孫星衍亟稱之著儀鄭堂集凡六十卷翁方綱爲作總序其目如下春秋公羊傳通義十一卷序一卷大戴禮記補注十三卷序錄一卷禮記卮言六卷經學卮言六卷詩聲類十二卷分例一卷少廣正負術內外篇六卷駢體文三卷

孔廣斌字伯誠號一齋繼涵嫡長子乾隆己亥舉人有異稟幼漸庭訓言動若老成扶牀之年已誦數十萬言當代宿學若戴震孫星衍之倫時就其父一堂講析疑義廣斌從後間出片

語相質莫不歎異以爲童鳥比長益銳於學自經傳子史至雜家靡不研究其父之著述多
版行惟蒐集諸家解麟經書厥緒未竟廣棧乃終之孝友出天性舞衣承歡鬻指知痛可謂
有學有行君子矣著有周官聯事二卷藤梧館詩鈔八卷校刻春秋世族譜春秋地名人
同名錄春秋閏例日食例左國蒙求國語解訂譌又手序隋劉炫春秋規過唐盧同春秋摘
微陳子昂春秋折衷論

孔廣根字心仲號小菘繼涵次子諸生署翰林院五經博士有秋蓼山房詩詞稿

孔廣權字季衡號蘅浦恩貢生候選直隸州判署翰林院五經博士性恬淡不仕以詩酒自娛
有愛蓮書屋詩集十餘卷觀海集一卷

孔廣電字瑞樞號雲樵道光庚子舉人補河南新鄉知縣歷署太康商邱居官行已一出以至
誠惻怛之心在職十餘年無不刑清政簡性廉介而好施與解組後囊橐蕭然晚歲舉一子
昭曾能讀父書青年發解人以爲明德之報云著有雲樵詩集二卷

孔廣謇字諤卿光緒乙亥恩科舉人大挑知縣需次陝西性情篤厚丁憂後哀痛不釋未幾薨

志以歿有家語注二卷

孔昭烜字顯思號晴峯 至聖七十一代孫乾隆辛卯舉人官肥鄉知縣有歸來吟集

孔昭熾字丙景號曙峯恩貢生太常寺博士有老槐書屋詩稿一卷

孔昭恢字景度號鴻軒嘉慶庚午舉人候選布理問性孝友才氣橫溢有春及園詩稿詞附

孔昭杰初名昭辰字漢瞻號俊峯恩貢生乾隆辛酉舉鄉魁歷任滄州越支長蘆鹽大使江南

鹽城知縣無不以興大利除積弊爲務一切碩畫偉績詳見知非年譜昭杰有用世才阻於

時不究其用年五十餘即歸養屢主東昌衛輝保定書院一以實學倡率後進年七十二無

疾而卒著有學庸指掌論語集注孟子摘要讀史格言拜經書屋文稿詩餘孤燈吟草知非

錄重校呂新吾救命書

孔昭煥字顯文號堯峯廣槩子乾隆九年襲衍聖公恪承父志與傅鉦繼汾等增修孔子世家

譜

孔昭仁字仁甫號芝耘嘉慶丙子舉人廣西平南知縣有出山小草一卷

孔昭薪字孟翹號克樵廣林子嘉慶戊寅恩科舉人癸未承父志重修大宗支譜十四卷

孔昭虔字元敬號荃溪廣森子嘉慶辛酉恩科進士翰林院編修歷任臺灣道陝西按察使署

布政使恭謹自守多著政績屢充試官得士多知名者恪承家學善隸書工吟詠嘗謂韻學壞於吳才老又謂三代六朝唐宋韻各不同欲分定韻書以示後學著古韻詞韻未卒業有鏡虹吟室詩集二卷經進稿一卷繪聲琴雅詞二卷扣舷小草詞一卷

孔昭薰字惠如號琴南嘉慶癸酉舉人臨邑訓導署翰林院五經博士天資超異嗜古工詩尤好倚聲深得宋人風趣耽心金石嘗搜得漢周府君碑額殘石唐御贊殘石宋孔道輔祭文均移置聖廟繼掘得宋金元明人書百二十石龕諸碑院復徧訪林廟碑碣編碑目一書凡六卷著貯雲詞二卷雪門竹枝詞一卷刻闕里孔氏詞鈔四卷

孔昭焜字石藻號堇生繼涵孫嘉慶癸酉舉人四川開縣知縣候選主事有利于不息齋古今體詩五卷制藝一卷却掃山巢賦一卷食我實館吟稿三卷

孔昭美字叔彥號網文恩貢生道光元年舉孝廉方正官四氏學學錄有福持精舍詩稿

孔昭煊字溫甫號小蘅道光二年舉人有半舫詞

孔憲奎字一蓮號恬齋 至聖七十二代孫貢生候選縣丞有一蓮詩草

孔憲培字養元號篤齋乾隆四十八年襲衍聖公昭煥適長子原名憲允乾隆三十六年高宗

幸闕里賜改今名好爲古今體詩袁枚序其集以爲詩有三體漢魏六朝得力於風少陵得力於雅昌黎得力於頌憲培詩沖淡高曠於風爲近非僅與唐宋人爭伯仲者可想見其風度矣著凝緒堂詩稿八卷

孔憲圭字玉川號鎮齋昭煥第三子恩貢生四氏學教授升用知縣丁母憂哀毀逾恆淡於世情惟以書詠自遣詩徑縱橫奇警晚年多奉道語有抱真集十卷志道集三卷

孔憲堃字載元號厚齋昭煥第五子恩貢生性聰明剛斷交人必誠信謀事有智略凡義所當爲即勇往直前不計利害就職州判効力南河年餘告歸侍母恬如也好讀博聞彊識精岐黃善奕能草書兼工吟詠析居後不屑治生產家日以落而教子有義方故子慶銓孫繁渥皆有成就有逸友堂適性草一卷詩餘偶存一卷

孔憲彝字叙仲號繡山道光丁酉科舉人內閣侍讀記名以道府用少師事李宗傳爲桐城古文學又從盛大士阮元遊學益進居京師久時與魏源曾國藩何紹基蘇廷魁嚴良訓彭蘊章諸耆宿切劘講習往往一會至數十人宜其學之無不通而詩文之體無不備也並嫻繪事尤工寫蘭海內外爭相購致著有韓齋文集四卷對嶽樓詩集二卷續集一卷詞一卷還

鄉吟一卷 選輯闕里孔氏詩鈔十四卷 曲阜詩鈔八卷

孔憲庚字和叔號經之道光己酉拔貢昭杰第三子能世其家學窮愁著書詩有真性情嘗問業於鎮洋盛大士大士許憲庚與其兄憲階憲彝爲三才子云著有十三經閣詩錄二卷 疏華館紀年詩一卷

孔憲達字儀鴻號逸泉亦曰柳泉道光時廩生聖廟四品官專治史學於往代譜牒尤精心切究輯有歷代帝王總紀一卷

孔憲毅字玉雙號閔仙咸豐辛亥恩科舉人丙辰進士改翰林院庶吉士歷官戶部江西司員外郎吏部掌印給事中廣東肇陽羅道爲人沈毅有爲克儉於家故能清操自持任給諫時抗直不畏權要與張之洞張佩綸葉蔭昉鄧承修等相抗衡一時臺閣生風憲毅幼即岐嶷好學工詩古文辭惜多不存稿以大宗一譜舊例服盡則止乃率同聖廟三品官從弟憲留依小宗五世而遷之義別訂炊經堂支譜一卷參訂聖門禮樂誌各一卷

孔憲璜字仲黼號涇石廣林孫昭薪子道光癸卯恩科舉人陝西候補知縣丁未重修大宗支

譜

孔慶鎔字陶甫一字冶山 至聖七十三代孫本生父憲增世父衍聖公憲培無子以慶鎔嗣
乾隆五十九年襲爵嘉慶元年仁宗詣太學行禮慶鎔方十歲入京陪祀嫺習禮儀無異成
人少長孝行益純篤父喪哀毀如禮事母出入起居不敢有違躬侍寢疾日夜不解衣迨本
生父歿於京邸兼程奔喪水漿不入口者三日性尤樸厚貴爲上公衣嘗再澣肉不重設而
遇宗族親朋之急難罔不竭力以助博雅工詩兼擅書畫尤喜寫蘭有六世祖毓圻遺法有
春華集一卷鐵山園集四卷鳴鶴集一卷忠恕堂集一卷

孔慶鋤字稷臣號誠甫道光丙申恩科進士改庶吉士工部都水司郎中軍機處行走品學爲
宣宗所知特膺外簡觀察平涼已出都矣復奉命秉臬山西案件無不細心剖決履任數月
多所平反累署藩司謹出納絕干謁吏畏民懷文宗繼統移節黔中四權藩篆其時粵匪縱
橫因念黔省下游與楚南毗連飛飭鎮遠黃平各府州嚴爲防禦以是匪患蔓延皖楚而全
黔寸土無傷慶鋤在黔最久守經達權縱與長官意偶相左必婉轉申說總期於事有濟當
事亦多樂從尤留意人才若胡林翼徐河清徐豐玉皆在守令職內爲之延譽推引均得藉
手以有爲甕安縣教匪脅掠甚衆慶鋤親督兵剿撫未浹旬而亂熄獨山州桐梓縣匪乘間

並起省城震動督率文武嚴防嘗攜親丁登陣不違衣食一面相其地勢分道剿捕賊以蕩平遵義抗糧聚衆該守請兵慶鋤親筆出示曉以大義情文剴切復札示該守罪歸禍首脅從罔治民竟帖然安比戶尸祝焉藩庫空虛協餉不至慶鋤勞心焦思鬚髮爲白而撫軍遇事咨詢章奏公牘大半皆慶鋤贊助心血幾枯遂搆日疾詳請開缺撫軍方倚爲左右手不之許又數月日漸失明乃告歸慶鋤性情平易近人雖御下從無疾言遽色而人嚴憚之子繁準以蔭生令山西瀕行時訓之曰出仕爲人如行路然步步須由中道不容絲毫曲折臨事宜簡不宜懶洩下宜嚴不宜酷絕夤緣之路明義利之關如斯而已慶鋤憂時發憤之作一寄之於聲歌讀其詩想見其爲人即其品其學荷九重特達之知其來知有自矣卒年五十有五著有省香齋詩集二卷

孔慶銓字菊農號儀甫道光戊戌進士選直隸平鄉知縣其地瘠貧數遇荒旱民益凋瘵三年十二官皆不終其任慶銓慨然往撫字噢休三歷寒暑百廢興舉生意盎然調交河一如治平鄉者治之官民相洽咸豐二年九月二十三日粵匪潰深州圍而至追軍不及孤城遂陷慶銓率練丁巷戰不屈被害子舉人繁渥同罵賊死於父之懷賊燬之遺骸僅存直隸總督

上聞文宗憫之有該父子一門忠孝之諭慶銓追贈知府照知府例賜卹敕建專祠光緒時縣紳公舉入祀名宦慶銓少穎異有文名性尤篤孝母徐氏就養夕膳晨滄非躬自侍察意不嫌而母亦不憚也賊至先一日請母出署暫避謂年高不耐震懼俟賊去即返諒無意外事也母云余年近八旬又何求汝既誓死報國不負吾教願與同盡慶銓跪而請曰如是益重兒罪母乃攜稚弱女眷俱出次歲三世孀孤間關旋里身外皆一無長物慶銓著述均銷燬無存嗣於族人處得種芝山房遺集一卷

孔繁瀨字文淵號伯海 至聖七十四代孫道光二十一年襲衍聖公晉太子太保好學能詩有蔭椿軒詩稿三卷

曲阜清儒著述記卷下

顏伯璟字士瑩復聖六十六代孫父胤紹守河間府子三人伯璟其長也次伯玠次伯珣伯璟有異稟讀書不屑章句談古人忠孝事輒感激奮發會清師入關薄畿輔河間孤城無援胤紹衣冠北向再拜集家人一室中而自登陴力守城破趣歸署闔門舉火自焚死時伯璟與仲弟伯玠居兗郡道阻不相聞未幾兗亦陷璟方與弟乘城守禦兵入守者皆潰璟體肥玠掖以行璟麾之曰父在河間存亡不可知汝當速去併命無益也玠持之泣璟遽自堙堦間躍下玠中流矢死璟左足傷爲邏卒所得以見其帥帥奇其貌問其家世告以河間已陷璟痛哭請於帥願得往求父骸骨帥憐而遣之足尙跛蹠跚走河間時盜賊充斥或竟日不得食遇賊慷慨泣求輒得釋卒得父遺骸歸常胤紹自焚時伯珣方六歲僕呂有年抱之走有年中流矢死珣匿民間璟並求得之倪尙書元潞過河間爲設祭曰父忠子孝吾師也璟自鼎革後絕意仕進暇輒爲詩痛弟玠之死與珣尤友愛同居三十年無間言教子以忠孝大義子六人皆有所成就歿後鄉人思之私諡曰孝靖先生著有詩集二卷

顏伯珣字石珍以恩貢生授江南壽州同知州故有芍陂爲水門三十六灌田萬餘頃孫叔敖所建也湮廢且百年公修復之年七十有四卒於官州民請祀名宦並附祀孫叔專祠著祇芳園集舊雨草堂詩集重修安豐陂志

顏光猷字秩宗號澹園復聖六十七代孫父伯璟娶明宗室鎮國中尉女朱氏遭亂不屈死復蘇伯環六男子朱氏出者三皆知名當世長即光猷次光敏次光敷一母生三偉人聞者異之光猷中韓棗榜進士選入詞館分校會試所得皆苦學能文士後多爲名卿大夫者會特旨命大臣以詩賦試詞臣公爲前茅而大臣以失上意覆校率顛倒之故公左遷補行人司正旣而以刑部郎中出守貴州安順府值提督李芳述馭將士無恩衆大激譟人人震恐公匹馬入其壘曉以大義皆投戈受命轉河東鹽運使除供億裁陋規通商民之困後以吏牘字偶誤鑄級遂歸里生平無他好詩文外惟以琴棋自娛事母色養老彌篤與人質直見人必勸以書不負人隨所得淺深皆食其報著有周易說義二卷澹園文集二卷水明樓制義二卷詩六卷

顏光敏字修來號遜甫別號樂圃康熙六年丁未進士除國史院中書舍人遷禮部儀制司主

事充會試同考官出監龍江關稅爬疏諸蠹務從寬大商旅德之累遷考功司郎中與修一統志以疾卒於京邸年四十有七生平不信浮屠星命之學嘗言軀體猶炭神氣猶火也火傳於炭然後能爲功炭當風則易燼置密室覆以灰則後燼然則謂人可長生者妄也謂死有時不可先不可後者亦妄也素善鼓琴精騎射工書翰人得其片札猶珍如珠玉當是時王士禛施閏章以能詩名天下公從之遊相與討論歷代詩家之得失日同諸名士唱和若宋犖田雯曹禾林堯英王又旦曹員吉謝重輝汪懋麟葉封號爲十子世多稱之自以射策中禮闈常鞅鞅及官吏部日每趨朝視事已輒據案濡丹草時藝一篇脫藁人便摹勒之讀者皆以爲子書也嘗言大學格致傳未亡錯簡在聖經內手輯定本識者韙之其說書傳務反復精思求聖賢微旨是真有心者故其立朝侃侃不苟同居家篤孝友然諾無欺直義出天性矣著有大學訂本一卷訓蒙日纂一卷未信編一卷樂圃詩集四卷未信堂時藝一卷家誠四卷舊雨草堂詩二卷南行日記一卷

顏光敏海內所稱學山先生者也生而奇警儀觀甚偉少孤師其兄敏喜讀春秋傳國策莊騷太史書康熙甲子舉於鄉其冬聖祖幸闕里釋奠至聖助祭者特恩卽授職光敏得宰縣

不肯就雍正五年登進士第入翰林授檢討補日講起居注官主浙江鄉試所拔多寒畯會學臣當檢上憶光敷名遂以督浙江學政編檢爲學院自光敷始也光敷益自激奮思捐軀命以答主知絕請謁嚴校勸束芻粒米不以累有司訓士如嚴師慈父士氣騰踊文風丕變三年在官雖舉主恩門不少徇顧大逆諸貴人意及復命遂引疾次歲卒於家著有懷山遺稿一卷學山近稿一卷

顏肇維初名雍字肅之別號漫翁復聖六十八代孫光敏子考充教習期滿授臨海知縣除里甲關稅徵米改折之累民情歡服察趙公河故道朱子所作三溝六浦悉鳩工浚之灌漑有資建太平橋別築砲臺三修戰艦九汎房二百增高湯信國備倭五十九城之七治績卓越三考升行人司行人改禮部儀制司致仕歸卒年八十有一著鍾水堂詩一卷賦莎齋詩一卷漫翁編年稿一卷太乙樓詩一卷

顏紹緒字振宗號柱世因兄紹統襲翰林院五經博士身故無子具題照兄終弟及之例承襲世爵順治間改授弘文院五經博士駕幸太學欽取陪祀賜衣賜宴恩賚有加紹緒念顏氏肇自黃帝自復聖顛子以後碩儒名臣偉人烈士代有作者歷代帝王恩禮之隆孔氏而外

亦無過顏氏者深懼譖牒散佚支派混淆不足以表章先烈奠其繫世因本三十世祖唐魯國公眞卿序譜之遺意精慎考訂前之有闕文者增之後之未發籍者續之是爲康熙五年纂修之顏氏族譜凡十卷

顏紹嚳字素子武庠生以琴書自娛家無儋石儲而絃歌不輟精醫術嘗療富室子酬之百金夷然却之其孤介如此著有清吟集

顏懋齡字引年號山木復聖六十九代孫肇維長子恩貢生候選直隸州判工詩善隸有木雁齋詩

顏懋僑字幼客肇維仲子博學彊記有詩名由陪祀恩貢充萬善殿教習寶齋二十三王謂曰久聞詩人顏幼客今乃得見耶乾隆七年冬召試瀛臺悉稱上意期滿授觀城諭修孔子廟嚴祀事簿正頌肉之格理學地及膳士田之侵於民者還其舊以憂歸著有蕉園集西華行卷天文管窺撫史奈園集秋莊小識霞城筆記十客樓集半江樓集雪浪山房集石鏡齋集又輯九邊形勝阨塞要害一書未脫稿卒

顏懋倫字樂清號清谷光猷孫康熙七年拔貢生薦授四氏學教授擢鹿邑令五年移疾歸後

發河南候補滑縣蝗甚勤能署裕州泌陽南陽皆有聲篤好文學初舉山東博學鴻詞第
二人廷試報罷益發憤爲古文詞與滋陽牛運震晉江何琦相切劘尤邃於詩著有什一編
夷門遊草癸乙編端虛吟舊止草堂集

顏懋價字質以肇維第三子出嗣從伯著有秋水閣遺稿一本

顏懋价字介子雍正十三年拔貢生少與兄懋倫博稽禮經詳喪制故其執親之喪必誠必信
勿有悔書出顏柳詩希杜韓任肥城諭修禮樂器遴佾生習儀容皆有復古之觀痛時俗葬
親慢與渴皆非古且糜費作正俗說又嘗佐盧文弼輯山左詩鈔與紀昀共資考訂著有水
木山房詩四卷

顏懋企字幼民號庶華肇維四子乾隆六年特典拔貢生性嗜書獨居一室坐臥縱橫卷帙中
雙目炯炯好考據典故鉤隱搜奇無細大恥一不知著述凡三十餘萬言自天文地理輿風俗
律禮兵農學校月令蠶法博奕醫卜以及草木蟲魚仙佛鬼怪之類靡不分門別部其文險
奧不可句詩更剗削幽拔嘔心肝出乃已惜年僅四十二而卒著葆光樓隨筆知依堂筆記
東壁偶識稽鬼談神錄飛塵集說西郭集覆瓿集又作顏氏史傳隄糜考古印考圖繪考

顏懋恕字如仲一字平叔乾隆戊午科舉人有卷石山房詩集二卷

顏崇湘字蘭州號荔村復聖七十一代孫乾隆九年甲子科舉人爲文宗法金聲有漱香亭評選

一卷學庸講義二卷

顏崇檢字書成號石冊乾隆庚辰恩科舉人官海陽教諭有停雲草堂詩集一卷

顏崇棻字采荔有從吾山房集

顏崇槩字運生小字符子光敏曾孫乾隆庚寅恩科舉人官興化知縣幼與桂馥齊名阮相國

元視學山左凡說經文酒之謙必以二子偕故二子之性情文翰皆知之悉而同薦於朝崇

槩見書必讀讀必紀錄識大識小各成卷軸又以父懋企好古墨著墨考未竟崇槩博摻宋

元明諸家所造補成顏氏墨考一卷著牒鯖小紀一卷心齋紀異一卷種李園集二卷摩墨

亭詩二卷詩話同席錄一卷

顏崇穀字用冠諸生素性慧直而才氣近李長吉年三十一而卒有遺稿曰小顏家詩二卷

顏懷禮字子真號約亭復聖七十一代孫襲五經博士少聰慧岐嶷讀書目數行下樂與能文

工詩之士遊至博戲徵逐聲伎狗馬之會一不與應童子試時學使者笑謂之曰君生而翰

苑復欲與寒士攫奪也懷禮唯唯謝曰竊聞上世亦間有進士襲世爵者非敢望也顧人不可不學問耳使者奇之讀其文益欣賞遂擢補四氏學弟子員第一旋與食餼爭父母以孝聞於兄弟相友愛鄉黨推重焉承爵後遜志時敏猶昔也著帶月草堂詩一卷

顏懷禪字彤賓號覺亭因兄懷禮早世無子具題代襲博士雍正八年重修聖廟工竣隨衍聖公謝恩引見於乾清宮乾隆三年駕幸太學行取陪祀二十一年幸魯陪祀累蒙賜資書籍衣緞懷禪好學能文嘗以爲井田廢而天下無善俗宗法廢而天下無世家譜牒之傳不可不講父子相代謂之世世三十年古者譜三十年小修六十年大修顏氏譜自紹緒纂訂後閱九十餘年深懼派衍日繁典型莫考乃遴宗黨之賢且才者分戶徵實開館搜輯而自董其成焉歷期四載而後成書視舊譜尤稱完善竊幸宗法之存與孔族相頡頏是爲乾隆二十四年重修之顏氏族譜

顏懷慤字思誠號慕宗乾隆戊申舉人官平陰教諭有耕餘草堂詩稿

顏士璋字聘卿復聖七十二代孫咸豐己未進士刑部河南司主事回籍辦團練以勞動奏獎補山西司主事題轉江西司郎中歷充律例館提調秋審處總辦以廉幹名屢經奏調隨赴

山西江寧查辦事件無不服其詳慎精密補授直隸河間知府丁憂服闋簡甘肅鞏昌知府外任前後十餘年振興學校積儲倉穀教養兼施士民愛戴光緒丁亥乞假回籍遇有善舉公益首先提倡尤殷殷與鄉人士以植品力學相勗勉丁酉疾卒年七十有六著有周易卦象釋義四卷

顏錫嘏字公純號眉峯復聖七十三代孫諸生襲五經博士有蕉窗吟稿

桂馥字冬卉號未谷先世貴溪人明初遷曲阜清白二十戶備至聖林廟灑埽桂氏其一也後錄從征功世襲尼山衛百戶遂爲望族馥以優行貢成均充教習授長山訓導中乾隆五十五年進士銓雲南永平知縣調順寧十年卒於官少警敏既補諸生益以古文辭自勵稍長與海內賢豪游周編修永年戴檢討震互勸其熟讀經傳以博反約乃舍去所讀書專制經焉嘗謂訓詁不明則經不通取許氏說文校治之垂四十年而成說文義證一書爲一生精力所萃嘗與周編修約買田築借書園祠漢師伏生以下諸人而藏書其中以招來學志雖未就而積書至五萬餘卷亦可謂富矣翁學士方綱阮相國元先後督學山左皆引重之推爲當世學人又工書分隸窺漢人堂奧得其傳者歷城郭敏磐掖縣翟雲升稱最也馥性淳

篤家居讓產於兄而客食於外凡前賢後進有一善必表出之嘗刻王考功士祿濤音集及牛進士運震空山堂遺文又以先世隸灑埽戶刻小印曰瀆井復民語人曰吾以先人清白爲榮也著說文義證五十卷札樸十卷繆篆分韻五卷晚學集八卷東萊草老落賸稿行笈草南征草各一卷

陶湘字澄菴順天監生遷曲阜爲湖山八子之一有湖山吟集自著鑄佛齋詩

陳見智字體元康熙庚戌進士授萬泉令丁內艱服闋補陳留執法不撓諸生有犯法者賂於守守爲解免見智力抵之法累遷刑部江西清吏司郎中出守金華府俗多溺女女子往往白首不得嫁見智嚴其禁所長育及遣嫁者不可勝計後以論事忤上官歸家居教授饅粥每不給卒年八十有五著晒園吟草二卷一線天傳奇二卷

陳士元字萬資乾隆戊申舉人嘉慶戊辰進士直隸新河知縣讀書不厭精思字字返身體驗誘掖後學孜孜不倦著學庸一貫錄二卷論語講義十二卷

陳穎初名彭字述菴其先上海人偶來曲阜家焉性沈默不逐聲譽借故家書讀之經史百家皆舉其略對客或終日不言然興之所至偶論古今事皆有據求一妄語不可得聽者輒忘

倦尤精醫學歷城周永年被徵校四庫書問醫學源流於穎穎草醫書考報之晚補諸生旋棄去著大學集說一卷傷寒卒病論考八卷診法一隅三卷

楊岳春字虛生其先濟南人遷曲阜任 聖廟奎文閣典籍少孤事母誠心竭力能得親歡喪偶不續撫姪如子訓讀成名居家敦睦而節之以禮每遇不平之事必爲居間排解兼嫺弓馬講武備能書精岐黃閒爲文詞詩賦雖無意求工而自超異年逾八十乃卒有意爲草一卷

顧彩字天石錫山人流寓曲阜衍聖公毓圻館之素矜名節耽吟詠三十年中或之燕趙或之楚粵天下之風俗無弗識也古今之人物事變無弗悉而應世之經權無弗通也當代名公鉅卿罔不折節交之然不屑屈志權要以乞援引詩得力於李杜昌黎毓圻恐其不自惜而詩稿散失也命子傳鐸傳鈔掇其佳者梓而壽之曰往深齋集凡八卷

徐國詔字承憲號南洲又號耐軒乾隆壬子舉人家貧有孝行色養兼盡親歿每食異味非奠不入口少工文詞旣乃究心經史尤重實踐自悔幼時褊急因采古今嘉言懿行除朱子小學已錄之外分類編輯以爲存心檢身之助附載居家三十六則於後名曰蓄艾集上下二

卷又南洲詩稿四卷

馮雲鵬字晏海世居崇川博學工詩道光六年來曲阜主昌平書院講席極力整飭士習不徒以帖括相矜尚而高材生之擢甲乙科者實接踵焉著有掃紅亭吟稿金石索各若干卷
馮雲鵬字集軒以知縣筮仕山左二十餘年道光戊子由滋陽調任曲阜寬嚴交濟敦勸農桑捐建昌平書院政成人和頌聲大起以憂解組後仍旅處是邑著聖門十六子一百六卷刊以行世

梁鍾傑字南一號柱峯山西絳州人乾隆壬午舉人官直隸大名同知後人流寓河南嗣遷曲阜有問竹軒詩稿

梁廷弼字子良號野亭鍾傑孫有半笏草堂吟稿卷香草詞一卷同人詩選一卷明末遺佚小傳二卷

魏恆祚字文西號蘇菴諸生不得志遜迹禪誦以貧死有蘇菴詩稿二卷

賈應寵字思退號鳧西拔貢生官刑部郎中爲人瑰崎好爲稗官之說有澹圃集二卷

東野衍增字蘊一號方川恩貢生官海豐教諭有源西詩草一卷

姜克謹一名思永字以慎號兼山祖籍東平自高祖文泰就選至聖林廟守衛百戶始占籍曲阜克謹充金絲堂啓事工篆書精考據爲桂馥門人著有慎餘草堂餘草曰在園草二卷游觀草一卷集益草三卷北風草一卷河干草一卷揆味草四卷

鄭曉如初名憲銓字曉如以字行一字子彬號意堂原籍歙縣遷曲阜以拔貢生中咸豐辛亥恩科舉人歷署廣東新安澄海曲江知縣補清遠皆有善政爲人篤實而勇毅人多愛而敬之亦往往畏而忌之曉如不以毀譽動其心故文與詩皆有以異乎人也少時務爲樸學而詰經能窺大義無支離穿鑿之弊嘗謂吾黨之恃以行遠傳後者不在文而在行可以見其節概矣著周易集說讀本四卷附周易古韻考筮義毛詩集解訓蒙一卷孝經約義一卷闕里述聞十四卷皇朝聖師考二卷就正詩草二卷就正詩續稿一卷

鄭鴻字伯臣曉如從子河南按察使司經歷有山東外史詩稿一卷漁洋秋柳箋注一卷

金德昌字佩秋光緒時貢生考職州判英才卓犖好學深思尤留心時務嘗謂國家貧弱外交公法不可恃即公理無可言發憤著書未及用世鬱鬱而卒有續明史紀事本末二十卷周秦三子富強篇六卷奇兵制勝推廣編八卷

濟南五三美術印刷社承印

闕里孔祥霖纂記

男令侃
令健校字

